

**Uunga siunnersuut: Qalerallit aamma aalisakkat allat ilaasa akitsuutaat pillugit  
Inatsisartut inatsisaata allanngortinneqarneranik Inatsisartut inatsisaat  
(Aningaasaqarnermut Akileraartarnermullu Naalakkersuisoq)**

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerreqarneranut**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Jens Immanuelson, Siumut, siulittaasoq  
Inatsisartunut ilaasortaq Randi V. Evaldsen, Demokraatit, siulittaasup tullia  
Inatsisartunut ilaasortaq Peter Olsen, Inuit Ataqatigiit  
Inatsisartunut ilaasortaq Bendt Kristiansen, Inuit Ataqatigiit  
Inatsisartunut ilaasortaq Martha Lund Olsen, Siumut  
Inatsisartunut ilaasortaq Ineqi Kielsen, Siumut  
Inatsisartunut ilaasortaq Kelly Berthelsen, Inuit Ataqatigiit

UPA 2017-imi ulloq 21. april 2017-imi siullermeerinninnerup kingorna ataatsimiititaliap siunnersuut misissorpaa.

**1. Siunnersuutip imarisaa siunertaalu**

Aalisariutit Kalaallit Nunaanni angerlarsimaffeqartut atorlugit avaleraasartoortanut akitsuut 0,55 kr.-inik apparlugu akitsuutip kiilumut 0,40 kr.-inngortinneqarnissaa kiisalu aalisariutit Danmarkimi, Savalimmiuni nunaniluunniit allani angerlarsimaffilittut nalunaarsorsimasut avaleraasartoortannut akitsuut 0,50 kr.-inik apparlugu akitsuutip kiilumut 1,00 kr.-inngornissaa siunnersuutigineqarpoq.

Kalaallit Nunaata imartaani avaleraasartoorniarnep soqutigineqarnerata annertusarnissaa siunnersuutikkut siunertarinearpoq, tassuunakkullu qulakkeerniarneqarluni ataatsimut avaleeraasartoortassanit ataavartumik pisassanik amerlanerusunik nunatta siunissami piumasaqarsinnaanera.

**2. Siunnersuutip Inatsisartunit siullermeerneqarnera**

Siunnersuut siullermeerneqarami akuersarneqarluarpoq. Siunnersuut nalinginnaasumik taperseerpoq. Tusarniaanermulli piffissaliunneqartoq sakkortuumik uparuarneqarpoq.

### 3. Tusarniaanermut akissutit

Inatsisissatut siunnersuut piffissami 10. februar 2017-imiit 17. februar 2017-imut ukununga tusarniaassutigineqarpoq:

Sulisitsisut (GE), NUSUKA, S.I.K., KNAPK, Aalisarnermut Piniarnermullu Naalakkersuisoqarfik, Inuusutissarsiornermut, Suliffeqarnermut, Niuernermit Nukissiuuteqarnermullu Naalakkersuisoqarfik, Deloitte, Grønlands Revisionskontor, GrønlandsBANKEN, Bank Nordik, KANUKOKA kiisalu Kommuneqarfik Sermersooq.

Tusarniaanermut akissuteqarnissamut piffissaliussap qaangiunnerani akissutisiffigineqarput NUSUKA, Sulisitsisut (GE), KNAPK, Aalisarnermut Piniarnermullu Naalakkersuisoqarfik, KANUKOKA aamma Kommuneqarfik Sermersooq.

Siunnersuut ulluni arfineq marluinnarni tusarniutigineqarsimammat ataatsimiititaliamit assut isornartoqartinneqarpoq. Tusarniaanermut akissuteqarnissamut taama sivikitsigisumik piffissaliinikkut oqartussaasut kattuffiillu susassaqtut tusarniaanermut atorluarneqarsinnaasumik akissuteqarnissamut mattunneqarsinnaapput. Taamaaliornikkut tamat oqartussaaqataanerannik tunngaveqartussaaneq aammalu pitsaasumik inatsisiliortussaaneq qaangiinnarneqartarput.

Kalaallit Nunaata aningaasaqarneranut taama pingaaruteqartigisumik inatsisiliortoqartillugu inatsisiliornermut atatillugu tusarniaanermut piffissaliussat nalinginnaasut malinneqartar-nissaat Aningaasaqarnermut Akileraartarnermullu Ataatsimiititaliamit kaammattuutigine-qassaaq.

### 4. Ataatsimiititaliap siunnersuummik suliarinninera

Naalakkersuisut tusarniaanermik ingerlatsinerannik siuliani uparuaanini Aningaasaqarnermut Akileraartarnermullu Ataatsimiititaliap uteqqissavaa. Ataatsimiititaliali oqaatigissavaa siun-nersuummut tamakkiisumik tapersiigami aammalu Naalakkersuisut siunnersuummut tunnga-vilersuutaannut isumaqataagami. Avaleraasartuunik aalisarnissap pilerinartuunissaata ukiuni aggersuni annertusarneqarnissaa pingaarluinnartuussasoq Naalakkersuisut inatsisissatut siun-nersuummut nassuiaatini oqaatigaat. Avaleraasartoornermi ukiuni tullerni pisassiissutit annertussusissaat aammalu taakkuninnga naalagaaffiit sineriallit akornanni agguataarinissap nunat atlantikup avannaaniittut isumaqatigiinniarnissaanni pisassiissutissanik tunineqarnis-samut pisassanillu agguataarinermut aalajangiissuulluinnartussat tassaapput pisaasarsimasut amerlassusii.

Pisassat 2017-imi aningaasanut inatsimmi allassimasutut amerlassuseqartinneqaannassappata akitsuutit appattitsinissamik siunnersuutip matuma tunngaviatigut kingunerissavaa avale-raasartuunut akitsuummit iluanaarutit 40 mio.-nit missaannit 20 mio. kr.-inut apparlutik affaannanngornerat.

Avaleraasartoortat katillugit 25.000 tonsinik amerleriarnissaat Naalakkersuisunit naatsorsuu-tigineqartoq ataatsimiititaliap paasivaa. Amerleriaat taanna pisassatut naatsorsuutigineqartut 2017-imi aningaasanut inatsimmi allassimasut 70 %-iisa missannik naleqarpoq. Tamanna im-minut assortuuttutut ataatsimiititaliamit isumaqarfiginarsinnaavoq, tamatumami peqatigisaa-



nik Naalakkersuisut paasissutissiimmata ukiuni kingullerni pisarineqartut annertuumik ikile-riarsimasut. Pisassat nikerarnerat silaannaap allanngorarneranik, allaffissornermi periaatsit assigiinnginnerannik, piffissaq aalisarsinnaanermut akuersissuteqarfiusoq kiisalu akitsuutit aaqqissugaanerat pisat nikerarnerannut pissutaasinnaasut Naalakkersuisut nassuiaatigaat. Tasunga atatillugu Naalakkersuisut paasissutissiissutigaa akitsuutit aaqqissugaanerat aalisarnermik inuussutissarsiutinik ingerlataqartut aalisarneqartut ikileriarnerannut pissutaanerpaatut tikkuaraat.

Avaleraasartuunut akitsuutip appartinneqarnissaanik siunnersuut Aningaasaqarnermut Akile-raartarnermullu Ataatsimiititaliamit akerlerineqanngilaq. Akitsuummik appaaneq avaleraasar-toorniarnerup ineriartornernut pitsaasumik sunniuteqassasoq ataatsimiititaliamit nalinginnaa-sumik naatsorsuutigineqarpoq. Pinngortitap pisuussutaanik atuinikkut isertitat ilaannik naam-maginatsumik amerlassuseqartunik nunatta karsiata pissarsitinneqarnissaata qulakkeerunne-qarnissaa ataatsimiititaliamit kissaatigineqarpoq. Tamatumani ataatsimiititaliamit tutsuigine-qarpoq Naalakkersuisut siunnersuutip aningaasaqarnikkut kingunerisassaani naatsorsuiner-minni aammalu siunnersuutip aningaasaqarnikkut kingunerisassaani nalilersuinermi suut pingaaruteqartinneqarnissaanni mianersorumaartut. Paatsoortoqaqqunaguli ataatsimiititaliamit ilanngullugu oqaatigineqassaaq piffissaq ungasinnerusoq isigalugu mianerisassat eqqarsaati-galugit pisassat taama annertutigisumik amerleriarnissaannik Naalakkersuisut naatsorsuu-tiginninnerannut uppernarsaatinik tigussaanagerusunik saqqummiussisoqarnissaa ataatsimiitita-liamit kissaatiginartinneqaraluarat.

#### **5. Siunnersuutip aningaasaqarnikkut kingunerisassai**

Qulequtaq matumani pineqartoq pillugu siuliani oqaaseqaatini Aningaasaqarnermut Akile-raartarnermullu Ataatsimiititaliap innersuussutigissavai aammalu siunnersuutip aningaasaqar-nikkut allaffissornikkullu kingunerisassai pillugit siunnersuuteqartup naatsorsuutigisaanut annertunerusumik oqaaseqaatissaqarani.

#### **6. Ataatsimiititaliap inassuteqaatai**

Tamanna tunngavigalugu siunnersuut akuerineqassasoq **ataatsimiititaliap isumaqatigiittup** inassutigaa.


Taama oqaaseqarluni isumaliutissiissummilu allassimasutut paasinnilluni ataatsimiittaliap siunnersuut aappassaaniigassanngortippaa.




Jens Immanuel, siulittaasoq



Randi V. Evaldsen




Peter Olsen



Bendt B. Kristiansen



Martha Lund Olsen



Ineqi Kielsen



Kelly Berthelsen